

OAIVEČÁLUS ÁVVIRIS 01.04.2019

Skuvllat fertejit čuovvulit givssidandieđuid

Oahpahasdepartemeanta lea almmuhan dieđuid, ahte dađi mielde dieđihuvvojit eambo givssidanáššit fylkkamánniide, ja njealji viđa givssidanáššis leat skuvllat rihkkon doaibmageatnegasvuođa, mii galgá sihkkarastit ohppiide oadjebas ja buori psykososiála skuvlabirrasa. Dat doaibmageatnegasvuohta bođii ge fápmui 2017 čavčča go oahpahasláhka rievdaduvvui. Skuvllat galget ge jođánit bidjat rievttis doaimmaid johtui, go soames oahppis ii leat buorre dilli skuvllas, ja ii okta ge rávis olmmoš skuvllas galgga sáhttit jorgalit sealggi ja dušše dadjat, ahte sii eai dieđe, dahje eai leat oaidnán eai ge gullan ahte oahppi givssiduvvo skuvllas. Dan rájes lea ge oahpahasláhka leamaš áibbas čielggas, ahte go skuvlii dieđihuvvo givssideapmi, de galgá skuvla dakka viđe bidjat doaimmaid johtui.

Dál čájehit ge Oahpahasdepartemeantta logut healkkehahtti dieđuid, ahte measta buot givssidan áššiin eai leat skuvllat bidjan doaimmaid johtui nu go oahpahasláhka gáibida.

Dan šálloša garrasit maiddáí oahpahasministtar Jan Tore Sanner. Son lea dadjan preassadieđáhusas, ahte dat lea áibbas dohkketmeahtun, go ohppiid ja váhnemiid mielas eai bargga skuvllat maide bissehan dihte givssidemiid. Sanneris lea ge čielga vuordámušat skuvllaid njunušolbmuide ahte skuvllain lea buorre skuvlabiras buot ohppiide.

Seamma vuordámušat dieđus leat muđui ge servodagas, ahte skuvllat duođalaččat atnet givssidanáššiid, go juohke okta givssideapmi lea okta beare ollu. Dát logut čájehit ahte skuvllat eai bargga doarvái bures eastadan dihte givssidemiid, go olu givssidanáššis eai leat bidjan johtui eastadandoaimmaid nu go oahpahasláhka gáibida. Dál dieđus vurdo ahte skuvllaid rektorat ja eaiggádat duođaleappot bargagohtet eastadan dihte givssidemiid, go dál lea oahpahasministtar čielgasit gohččon skuvllaid eastadit givssidemiid skuvllain.

Buot mánáin lea riekti oadjebas skuvlaárgabeaivái, iige oktage galggašii givssiduvvot. Liikká leat ain olu mánát geat beaivválaččat šaddet dán vásihit. Maiddáí Sámis. Ii okta ge skuvlamánná galgga dárbbasit baluin skuvlii vázzit, go diehtá doppe son givssiduvvo ja muhtumat maiddáí doaruhuvvojit. Skuvllat han leat lága bokte geatnegahttojuvvon lámčit buori ja dorvvolaš skuvlladili buot ohppiide, muhto hárdin- ja givssidanstatistihkka čájeha ahte skuvllat rahčtet ollašuhttimis dán geatnegasvuođa, ja lea dárbu bidjat eanet návccaid dasa.

BARGOBIHTÁT

SYNONYMAT

Gávna čuovvovaš doahpágiidda teavsttas synonymaid:

Mobben

Vuoigatvuohta

Suorggahahti

Jođiheaddji

Searat

ČILGET DOAHPAGIID

Čilge čuovvovaš doahpágiid:

Vuordámuš

Servodat

Duođalaš

Eastadit

Dii fertebehtet snuogga dieđuid maddái neahtas:

1. Mii lea fylkkamánni?
2. Mii lea givssideapmi?
3. Goas galgá dieđihit givssideami fylkkamánii?
4. Maid leat skuvllat rihkkon?
5. Maid galget skuvllat bargat go givssideapmi fuomášuvvo?
6. Manne leat ollu givssidanáššit?
7. Mii lea buot mánáid ja nuoraid riekti skuvlavácciidettiin?
8. Mii lea oaivečálus? Geahča vihtta eará Ávvir-áviissa ja loga oaivečállošiid? Man birra dat leat?